

Namminersornerullutik Oqartussat missingersuutaat pillugit Inatsisartut inatsisaat nr. 8, 29. oktober 1999-imeersoq

Kapitali 1

Aningaasaliissuteqartarnermi tungaviit

§ 1. Namminersornerullutik Oqartussat aningaasatigut missingersuutaanni, Aningaasanut Inatsimmi, ilaapput Nunatta Karsiata ukiup aningaasanut inatsisip atuuffiata ingerlanerani aningaasartuutai isertitaalu tamarmik.

Imm. 2. Inatsisartut Aningaasaqarnermut Ataatsimiititaliaat ukiup aningaasanut inatsisip atuuffiata ingerlanerani siunertanut sillimaffigeriingisanut aningaasaliissuteqarnissamut aningaasaliissutaareersunilluunniit allannguissamut Inatsisartut sinnerlugit akuersissuteqarsinnaavoq, taakkulu tamatuma kingorna ilassutitut aningaasaliissutinut inatsimmut ilanngunneqartassapput, takuuk kapitali 4.

Imm. 3. Aningaasaliissuteqarnissamik sioqqutsisumik akuersissuteqartoqareertinnagu aningaasartuuteqarnanilu aningaasanik atuisoqarsinnaangilaq.

§ 2. Piffissaq aningaasanut inatsisip atuuffia januaarip aallaqqaataaniit decembarip 31-annut ingerlasarpoq.

§ 3. Aningaasaliissuteqarneq Naalakkersuisunut ilaasortap aalajangersakkat erseqqinnerusut ma-lillugit aningaasanik atuinissanut piginnaatitsissutaavoq. Naalakkersuisunut ilaasortaq sukkulluunniit Naalakkersuisunut ilaasortaasoq Naalakkersuisoqarfimmud pineqartumut aningaasaliissutinut akisussaavoq.

§ 4. Aningaasanut inatsit aningaasartuutissanut missingersuusianut isertitassanullu missingersuusianut avinneqartassaaq. Aningaasartuutissanut missingersuusiani nalunaarsorneqartassapput ani-ngaasartuutissat tamarmiusut kiisalu isertitassat ingerlatsinermut tungassuteqartut. Isertitassanut missingersuusiani nalunaarsorneqartassapput naalagaaffiup Namminersornerullutik Oqartussanut tapiissutissai kiisalu isertitassat akileraarutinut akitsuutinullu tungassuteqartut. Aamma isertitassanut missingersuusianut ilaatinneqartassapput iluanaarutinit pissarsiat, naliliutinik sanaartugaatinillu il. il. tunisaqarnernit isertitat.

Imm. 2. Aningaasaqarnermut Naalakkersuisoq kontunut inissitsiterivimmik aalajangersaasassaaq. Aningaasaliissutit kontutut pingaarnertut inissinneqartassapput.

Imm. 3. Aningaasanut inatsit ilanngaattissat ilanngaatigereernagit periuseq malillugu suliarineqartassaaq. Aningaasartuutissatut aningaasaliissutit isertitassaqarnerussutinut amerlaqataannut innersuussinikkut sinnerneqartassanngillat, taamaattorli takukkit §-it 7 aamma 15.

§ 5. Aningaasanut inatsit Inatsisartut ukiup aningaasanut inatsisip atuuffiata ingerlanerani ani-ngaasaqarnikkut tulleriinnilersuinerannut tamakkiisumik takussutissaassaaq.

Imm. 2. Naalakkersuisunut ilaasortap aningaasaliissutinut ataasiakkaanut akisussaasup

aningaasaliissutit taakku kinguneqarluartumik atorneqarnissaasa qulakkeerneqarnissaat pisussaaffigaa.

§ 6. Aningaasaliissut oqaasertaliussartalerneqarsinnaavoq. Oqaasertaliussat taamaallaat aningaasaliissuteqarnermi aqutsinermut tapertaasinnaapput.

Imm. 2. Oqaasertaliussat taamaallaat ukiumi aningaasanut inatsisip atuuffiani aningaasanut inat-simmum ilanngunneqarfigisimasaminni atuuttassapput.

Imm. 3. Oqaasertaliussaliinikkut inatsimmi atuuttumi aalajangersakkanut aalajangersimasanut ilassutinik aalajangersaasoqarsinnaavoq. Taamaallaat inatsit atuuttoq oqaasertaliussaliinikkut al-lanngortinneqarsinnaavoq allannguut piffissamut aalajangersimasumut atuuttussaappat.

Imm. 4. Inatsisip oqaasertaliussaq atorlugu piujuartussanik nalinginnaasunilluunniit allannguuteqartinneqarsinnaanngillat.

Imm. 5. Oqaasertaliussat ukiumi aningaasanut inatsisip atuuffiini tullerni aningaasaliissutissanik siuartitsissutaasinnaanngillat.

§ 7. Aningaasanut inatsimmi aningaasaliissutit aningaasaleeriaatsinut immikkoortitaartunut agguataarneqartassapput. Aningaasaleeriaatsit aningaasanik atuinissaq pillugu maleruagassanut erseqqinnerusunut aalajangiisuusassapput, takuuk kapitali 4.

Kapitali 2

Aningaasanut inatsisissatut siunnersuut

§ 8. Aningaasanut inatsisissatut siunnersuut ukiup aningaasanut inatsisip atuuffissaa sioqqullugu kingusinnerpaamik septembarip aallaqqaataani Naalakkersuisunit Inatsisartunut saqqummiunneqartassaaq.

§ 9. Aningaasanut inatsisissatut siunnersuummut allannguutissatut siunnersuutit Inatsisartut Su-leriaasissaanni aalajangersakkat naapertorlugit saqqummiunneqartassapput.

Imm. 2. Aningaasaqarnermut Naalakkersuisoq Naalakkersuisut allannguutissatut siunnersuutaasa ilusilersorneqartarnissaannut maleruagassanik aalajangersaasassaaq.

§ 10. Aningaasanut inatsit ukiup aningaasanut inatsisip atuuffissaata siuliani kingusinnerpaamik novembarip aallaqqaataani akuersissutigineqareertassaaq.

Kapitali 3

Aningaasanut inatsisip aaqqissuusaanera imarisaalu

§ 11. Aningaasanut inatsisip imarisassavai inatsisip oqaasertai.

Imm. 2. Inatsisip oqaasertaasa imarissavaat aningaasaliissutinut nalunaarsuut, ukiumi aningaasanut inatsisip atuuffissaani aningaasaliissutissat kontunut pingaarnernut immikkoortitigaallutik nalu-naarsorsimaffigisaat.

Imm. 3. Aammattaaq inatsisip oqaasertaasa imarissavaat ukiumi aningaasanut inatsisip atuuffissaani oqaasertaliussatut allassimasussat.

Imm. 4. Aningaasaqarnermut Naalakkersuisoq oqaasertaliussanik ilanngussisarnissaq pillugu

ma-leruagassanik erseqqinnerusunik aalajangersagaliortassaaq.

§ 12. Aningaasanut inatsimmi ilaasassapput inatsisip oqaasertaanut nassuiaatit.

Imm. 2. Nassuiaatit imarisassavaat angusanut nalunaarsuut, inatsisip immikkoortuinut assigiinngisitaartunut angusanut nalunaarsuut kiisalu kontunut pingaarnernut nalunaarsuut; nassuiaatit najoqqutassiaassapput.

Imm. 3. Taakku saniatigut nassuiaatini ilaasassapput missingersuusianut ilaatitat oqaasertaliussanullu nassuiaatit, aningaasaliissutit oqaasertaliussallu tunngavilersuutaannut erseqqinnerusumik nassuiaataasussat.

Imm. 4. Aningaasaqarnermut Naalakkersuisoq nassuiaatit imm. 2-mi 3-milu taaneqartut suliarineqartarnissaannut maleruagassanik aalajangersaasarsinnaavoq.

§ 13. Nunatta Karsiani isertitassanut aningaasartuutissanullu missingersuusiani angusanut nalunaarsuummi missingersuutitigut angusat tamarmiusut ersersinneqartassapput. Nalunaarsuut immikkoortunut pingaarnernut naalakkersuisoqarfinnullu avinneqartassaaq.

Imm. 2. Inatsisip immikkoortuinut assigiinngisitaartunut angusanut nalunaarsuut suliaasaqarfinnut naalakkersuinikkullu anguniagaqarfinnut immikkoortunut avinneqartassaaq.

Imm. 3. Kontunut pingaarnernut nalunaarsuummi aningaasaliissutinut ataasiakkaanut atatillugu naatsorsuutitigut angusat kingulliit, aningaasanut inatsimmi aningaasaliissutit kingulliit kiisalu ukiup aningaasanut inatsisip atuuffiata kingorna ukiuni tullerni pingasuni aningaasaliissutissat nikerarnissaattut naatsorsuutigisat ilisimatitsissutigineqartassapput.

Imm. 4. Missingersuusianut ilaatitat imarisassavaat kontuni pingaarnerni ataasiakkaani aningaasaliissutinut tunngavilersuutit erseqqinnerusut. Sanaartugassanut aningaasaliissutinut tunngatillugu kontumi pingaarnerni ataatsimi pilersaarusiata arlallit ilaasinnaasarput, taakkunungalu tunngatillugu pilersaarusiannut ataasiakkaanut aningaasaliissuteqarnerni tunngavilersuutit nalunaarneqartassapput.

Imm. 5. Oqaasertaliussanut nassuiaatit imarisassavaat oqaasertaliussamik ilanngussinermi tunngavilersuutit.

Kapitali 4

Aningaasaliissutit suuneri atuinissamullu maleruagassat

§ 14. Aningaasaliissutit aningaasaleeriaatsinut tallimanut ukuusunut immikkoortiterneqartassapput:

- 1) Ingerlatsinermut aningaasaliissutit.
- 2) Aningaasaliissutit inatsisitigut pisussaaffigisat.
- 3) Tapiissutissatut aningaasaliissutit.
- 4) Sanaartugassanut aningaasaliissutit.
- 5) Isertitassatut aningaasaliissutit.

Imm. 2. Aningaasaleeriaatsip sorliup toqqarneqarnissaani ingerlatassap suunera apeqqutaasassaaq.

§ 15. Ingerlatsinermut aningaasaliissutit ingerlatsivimmi ingerlatsivinniluunniit imaluunniit allaffissornikkut immikkoortortani aningaasaliissuteqarnermut ilaasumi ilaasuniluunniit ingerlatsinermut ilanngaaseereerluni aningaasartuutissanik atuinissamut killiliussatut

anigaasaliissutaapput.

Imm. 2. Anigaasaliissuteqarnikkut Naalakkersuisunut ilaasortaq akisussaasoq missingersuusiormi tunngavigineqartut naapertorlugit ingerlatsinermut anigaasartuuteqartarnissaminut ingerlatsinermilu isertitaqartarnissaminut piginnaatinneqartassaaq.

Imm. 3. Akissarsianut anigaasartuutit taamaallaat ingerlatsinermut anigaasaliissutinit anigaasartuutigineqarsinnaapput.

Imm. 4. Ingerlatsinermut anigaasaliissutini ingerlatsivimmu ingerlatsivinnulluunniit imaluunniit allaffissornikkut immikkoortortanut ingerlatsinermut anigaasaliissutinut attuumassuteqartumut at-tuumassuteqartunulluunniit atatillugu sanaartugassanut iluarsaassinernullu anigaasartuutit annikinnerusut anigaasartuutigineqarsinnaapput. Anigaasaqarnermut Naalakkersuisoq tamanna pillugu maleruagassanik aalajangersaasassaaq.

Imm. 5. Anigaasaqarnermut Naalakkersuisoq Missingersuusiormut Malittarisassani ileqqaaruteqarnermik aaqjissuussinissaq pillugu maleruagassanik aalajangersaasinnaavoq.

Imm. 6. Anigaasaqarnermut Naalakkersuisoq namminersortitatut suliffeqarfeqarneq isertitanillu matussusertakkanik ingerlataqarneq pillugit maleruagassanik aalajangersaasinnaavoq.

§ 16. Anigaasaliissutit inatsisitigut pisussaaffigisat atorineqartassapput pisartagaqartut aalajangersimasut immikkut inatsisiliornikkut aalajangersimasunik pisartagaqartussanngortinneqarsimagaangata aammalu pisartagarineqartussat annertussusissaat naatsorsorneqartarneriniluunniit tunngavissat immikkut inatsisiliornikkut aalajangersarneqarsimagaangata.

Imm. 2. Anigaasaliissuteqarnikkut Naalakkersuisunut ilaasortaq akisussaasoq inatsisitigut pisussaaffigisanut anigaasartuuteqarnissaminut piginnaatinneqartassaaq.

Imm. 3. Anigaasaliissutinut atatillugu missingersuusianut ilaatitani nalunaarneqartassapput anigaasartuutit inatsit suna tunngavigalugu anigaasartuutigineqarneri pillugit paasissutissat kiisalu anigaasaliissuteqarnermut atatillugu naatsorsuineri tunngaviit missingersuusiormilulu tunngavigineqartut.

Imm. 4. Anigaasanut inatsimmi anigaasaliissutit inatsisitigut pisussaaffigisat anigaasartuutissanik missingiinerusarput, taamaammallu anigaasartuutit amerlanerusarsinnaapput ikinnerusarsinnaallutilluunniit. Anigaasaliissutinut naleqqiullugu nikingassutit naatsorsuutitut ilanngunneqartassapput.

Imm. 5. Kisiannili anigaasaliissutip inatsisitigut tunngaviisa allannguuteqarnerisa kingunerisaannik anigaasartuuteqarnerunerit anigaasartuutikinnerunerilluunniit ilassutitut anigaasaliissutinut inatsimmut ilanngunneqartassapput kiisalu anigaasanut inatsimmi tullermi ilanngunneqartassallutik.

§ 17. Tapiissutissatut anigaasaliissutitigut Naalakkersuisunut ilaasortaq akisussaasoq inatsisitigut pisussaaffiginngisanut anigaasartuuteqartarnissaminut piginnaatitaasassaaq.

§ 18. Sanaartugassanut anigaasaliissutitigut Naalakkersuisunut ilaasortaq akisussaasoq pigisanik aalaakkaasunik pisinissanut, sanaartorluni tunisassiornissanut, sanaartorniartunut anigaasanik taarsigassarsisitsinissanut kiisalu sanaartornissanut, iluarsaassinissanut il. il. atatillugu anigaasanik tapiissuteqartarnikkut anigaasartuuteqartarnissaminut piginnaatitaavoq.

Imm. 2. Sanaartugassanut anigaasaliissutit ataatsit sanaartugassanut pilersaarusiamik ataatsimik

imaqartassapput. Immikkut ittunik pissutissaqartillugu sanaartugassanut aningaasaliissutit ataatsit sanaartugassanut pilersaarussianik annikitsukkuutaanik arlalinnik imaqarsinnaapput.

Imm. 3. Sanaartugassanut aningaasaliissutini sanaartugassanut pilersaarutip aallartitinneqarnissaa aningaasanut inatsimmi imaluunniit Inatsisartut Aningaasaqarnermut Ataatsimiititaliaanni akuersissutigineqartassaaq.

Imm. 4. Sanaartugassanut pilersaarusiap akuersissutigineqarnissaanut piumasaqaataavoq ingerlatsineranut sanaartornermulluunniit aningaasartuutissat malitsigisassai pilersaarusiap nassuiaatitaani ersersinneqarsimassasut.

Imm. 5. Sanaartugassanut aningaasaliissutit, sanaartugassanut pilersaarusiaq Inatsisartut imaluunniit Inatsisartut Aningaasaqarnermut Ataatsimiititaliaata akuersissutigisaa tunngavigalugu, atorineqartussanngortinneqareeraangata aningaasanut inatsisini ukiuni ataasiakkaartuni pilersaarusiormut aningaasartuutissartaat, aningaasartuutigineqarnissaasa ingerlanissaattut naatsorsuutigisat naapertorlugit, Sanaartugassanut Iluarsagassanullu Aningaasaateqarfimmut nuutinneqartassapput, takuuk kapitali 5.

Imm. 6. Sanaartugassanut pilersaarusiamut aalajangersimasumut ilassutissanik aningaasaliissuteqartoqareersimatinnagu sanaartugassanut pilersaarusiap tamarmiusumik aningaasartuutitassaanut aningaasaliissutinit nikingasumik aningaasartuuteqartoqarsinnaanngilaq.

§ 19. Isertitassanut aningaasaliissutitigut Naalakkersuisunut ilaasortaq akisussaasoq inatsisitigut pissusaaffigisanut pissusaaffiginngisanullu isertitaqartarnissaminut piginnaatinneqarpoq. Naalagaaffiup Namminersornerullutik Oqartussanut tapiissutissai kiisalu akileraarutitigut akitsuutitigullu isertitassat isertitassanut aningaasaliissutitit nalunaarsorneqartassapput. Aammattaaq isertitanut aningaasaliissutit iluanaarutinit pissarsineranut, naliliutinik sanaartugaatinillu tunisaqarnermut il. il. atatillugu atorineqartassapput. Isertitassanut aningaasaliissutit kisimik aningaasanut inatsimmi iser-titassatut missingersuusiani ilaatinneqarsinnaapput.

§ 20. Aningaasaqarnermut Naalakkersuisoq aningaasaliissutinik allatut atuisarnissamut/isertitaqartarnissamut maleruagassanik Missingersuusiornermut Malittarisassani aalajangersaasassaaq.

Kapitali 5

Sanaartugassanut Iluarsagassanullu Aningaasaateqarfik

§ 21. Sanaartugassanut Iluarsagassanullu Aningaasaateqarfik aningaasatigut missingersuusiornermi naatsorsuuserinermilu aaqqissuussineranut aningaasaateqarfiuvoq, Nunattalu Karsianut ilaalluni.

Imm. 2. Sanaartugassanut Iluarsagassanullu Aningaasaateqarfik aningaasanut inatsimmi sanaartugassanut aningaasaliissutini isertitatus nalunaarsorneqartassaaq. Tamanna aamma sanaartugassanut aningaasaliissutinut Inatsisartut Aningaasaqarnermut Ataatsimiititaliaannit kingusinnerusukkut akuersissutigineqartunut atuuppoq.

Imm. 3. Sanaartugassani pilersaarusiani aningaasartuutissat Sanaartugassanut Iluarsagassanullu Aningaasaateqarfimmi aningaasartuutitit nalunaarsorneqartassapput.

Imm. 4. Ukiut aningaasanut inatsisit atuuffiisa akornini akiliuteqartarnerit nikinneri

Sanaartugassanut Iluarsagassanullu Aningaasaateqarfimmi nalimmassarneqartassapput.

Imm. 5. Sanaartugassanut pilersaarusionsi ataasiakkaani tamakkiisumik aningaasartuutissatut aningaasaliissutaasimasunit aningaasartuutikinnerussutit nalingi pilersaarusionsiat pineqartut naammassereeraangata Nunatta Karsianut utertinneqartassapput.

§ 22. Aningaasaqarnermut Naalakkersuisoq Sanaartugassanut Iluarsagassanullu Aningaasaateqarfiup ingerlanneqarnissaanut aningaasatigut missingersuusiortarnissat aningaasaliissuteqartarnissallu pillugit aalajangersaasassaaq.

§ 23. Naalakkersuisunut ilaasortaq sanaartornermut tunngassuteqartunut akisussaasoq Sanaartugassanut Iluarsagassanullu Aningaasaateqarfiup allaffissornikkut ataavartumik ingerlanneqarneranut oqartussaassaaq.

§ 24. Naalakkersuisut Sanaartugassanut Iluarsagassanullu Aningaasaateqarfiup ingerlatai pillugit ukiumoortumik nassuiaasiortassapput, tassungalu ilannguttassallugit tulleriinneri malillugit pilersaarusionsiat nutaat, pilersaarusionsiat ingerlanneqartut kiisalu pilersaarusionsiat naammassineqarsimasut taamaatinneqarsimasulluunniit killiffii pillugit nassuiaatit.

Imm. 2. Nassuiaat sanaartugassanut pilersaarusionsianut kiisalu iluarsagassanut pilersaarusionsianut avinneqartassaaq.

Kapitali 6

Aningaasaliissutit nutaat allanngortitalluunniit

§ 25. Ukiup aningaasanut inatsisip atuuffiata ingerlanerani nutaanik aningaasaliissuteqarnissamut oqaasertaliussaqaarnissamullu imaluunniit aningaasaliissutinik oqaasertaliussanillu allanngortitsinissamut piunasaqaataavoq Inatsisartut Aningaasaqarnermut Ataatsimiititaliaat Inatsisartut sinnerlugit akuersissuteqaqqaarsimassasoq.

Imm. 2. Inatsisartut Aningaasaqarnermut Ataatsimiititaliaata nutaanik aningaasaliissuteqarnissamik oqaasertaliussaqaarnissamillu imaluunniit aningaasaliissutinik oqaasertaliussanillu allanngortitsinissamik qinnuteqaatit suliarineqarnissaat Inatsisartunut innersuussutigisinnaavaa.

§ 26. Ukiup aningaasanut inatsisip atuuffiata ingerlanerani nutaanik aningaasaliissutigineqartut oqaasertaliunneqartullu imaluunniit aningaasaliissutit oqaasertaliussallu allanngortinneqartut aningaasaliissutigineqarnermik kingorna ilassutitut aningaasaliissutinut inatsimmut ilannguneqartassapput.

Imm. 2. Aningaasanut inatsimmi oqaasertaliussaqaq tunngavigalugu imaluunniit oqaasertaliussaqaq kingusinnerusukkut Inatsisartut Aningaasaqarnermut Ataatsimiititaliaanni akuersissutigineqartoq tunngavigalugu aningaasaqarnikkut iliuitsit ilassutitut aningaasaliissutinut inatsimmut ilannguneqartassapput.

Imm. 3. Naalakkersuisut ilassutitut aningaasaliissutissanut inatsisissatut siunnersuut kingusinnerpaamik ukiup aningaasanut inatsisip atuuffiata kingorna Inatsisartut ileqquusumik ataatsimiinnissaannut siullermut Inatsisartunut saqqummiuttassavaat.

§ 27. Aningaasaliissutini inatsisitigut pisussaaffigisani aningaasartuuteqarnerussutit

anigaasartuutikinnerussutilluunniit aatsaat nutaamik inatsisiliortoqarneranik inatsimmilluunniit allannguisoqarneranik pissuteqaraangamik anigaasaliissutillu Inatsisartut Anigaasaqarnermut Ataatsimititaliaannit akuersissutigineqarsimagaangata ilassutitut anigaasaliissutissatut siunnersuummut ilan-ngunneqartassapput.

§ 28. Anigaasaqarnermut Naalakkersuisup nutaanik anigaasaliissuteqartoqarnissaanik anigaasaliissutinilluunniit allanngortitsisoqarnissaanik qinnuteqaatit Naalakkersuisut sinnerlugit Inatsisartut Anigaasaqarnermut Ataatsimiititaliaannut saqqummiuttassavai.

Imm. 2. Nutaanik anigaasaliissuteqartoqarnissaanik anigaasaliissutinilluunniit allanngortitsisoqarnissaanik qinnuteqaatit taamaallaat anigaasaqarnikkut iliuusissanut pingaarutilinnut aammalu anigaasanut inatsisissap suliarinerani sillimaffigereerneqarsinnaasimanngitsunut tunngasuusassapput.

Imm. 3. Nutaanik anigaasaliissuteqartoqarnissaanik anigaasaliissutinilluunniit allanngortitsisoqarnissaanik qinnuteqaatit taamaallaat anigaasaqarnikkut iliuusissanut ukiup anigaasanut inatsisip atuuffiata ingerlanerani anigaasartuuteqarnikkut sunnuteqartussanut tunngasuusassapput.

Imm. 4. Nutaanik anigaasaliissuteqartoqarnissaanik anigaasaliissutinilluunniit allanngortitsisoqarnissaanik qinnuteqaatit paasissutissanik attuumassuteqartunik imaqartassapput, taakkunungalulu ilaassallutik qinnuteqaatip anigaasaqarnikkut toqqaannartumik toqqaannangitsumilluunniit ki-ngunerisassai pillugit paasissutissat tamakkiisut.

Imm. 5. Anigaasaqarnermut Naalakkersuisoq nutaanik anigaasaliissuteqartoqarnissaanik anigaasaliissutinilluunniit allanngortitsisoqarnissaanik qinnuteqaatit suliarineqartarnissaat pillugu aalajangersagaliortassaaq.

§ 29. Ilassutitut anigaasaliissutinut inatsisip imarisassavai inatsisip oqaasertai.

Imm. 2. Inatsisip oqaasertaasa imarisassavaat anigaasanut inatsimmi anigaasaliissutit oqaasertaliussallu allannguutaat.

Imm. 3. Anigaasaliissuteqarnikkut allannguutit anigaasanut inatsimmi anigaasaliissutit, ilassutitut anigaasaliissutit anigaasaliissutillu tamarmiusut takussutissiarineqarnerisigut nalunaarneqartassapput.

Imm. 4. Ilassutitut anigaasaliissutinut inatsimmi ilaasassapput inatsisip oqaasertaanut nassuiaatit. Nassuiaatit imarisassavaat missingersuusianut ilaatitat ilassutitut anigaasaliissutinut ataasiakkaanut atatillugu missingersuusiornermi tunngavilersuutitallit kiisalu oqaasertaliussanut nassuiaatit.

Imm. 5. Anigaasaqarnermut Naalakkersuisoq ilassutitut anigaasaliissunut inatsisip suliarineqartarnissaanut aalajangersagaliortassaaq.

Kapitali 7

Anigaasartuutunik isertitanillu nakkutilliisarneq

§ 30. Naalakkersuisut Inatsisartut ukiup anigaasanut inatsisip atuuffiata ingerlanerani anigaasaqarnikkut tamakkiisumik tulleriinnilersuinerata eqquutsinneqarnissaa qulakkeerniarlugu anigaasartuutunik isertitanillu ingerlaavartumik nakkutilliinissartik pisussaaffigaat, takuuk § 5.

§ 31. Naalakkersuisut Namminersornerullutik Oqartussat aningaasartuutaasa isertitaasalu nikerarneri pillugit paasisutissanik pissarsiniartarnek ingerlatitseqqittarnerlu pisussaaffigaat, taakkunun-nga ilanngullugit aningaasanut inatsisip tunngavilersuutitai.

Imm. 2. Ilassutitut aningaasaliissutininut inatsisissatut siunnersuut ukiup aningaasanut inatsisip atuuffiata kingorna Inatsisartut ileqquusumik ataatsimiinneranni siullermi Naalakkersuisunit saqqummiunneqartassaaq. Tassunga atatillugu aningaasanut inatsisip tunngavilersuutitaanut naleqqiullugu nikingassutit pillugit nassuiaateqartoqartassaaq.

Imm. 3. Naalakkersuisut Namminersornerullutik Oqartussat aningaasatigut ingerlanerat pillugu ukiumoortumik nalunaarut, aningaasaqarniarnikkut ingerlatsineq pillugu nalunaarut, Inatsisartut upernaakkut ataatsimiinneranni saqqummiuttassavaat, tassungalu ilannguttassallugit aningaasartuutit isertitallu nikerarnerinut tunngassuteqartut.

Imm. 4. Ukiumoortumik nalunaarutip taassuma aningaasartuuteqarfimmi isertitaqarfimmilu pingaarutilimmi ataatsimi arlalinniluunniit aningaasarsiornikkut ingerlatatigullu ineriartorneq pillugu nalilersuilluni misissuinerit inerneru imarisassavai.

Imm. 5. Naalakkersuisut Inatsisartut ukiakkut ataatsimiinneranni Namminersornerullutik Oqartussat ukiumi aningaasanut inatsisip atuuffiani ingerlasumi aningaasartuutaasa isertitaasalu nikerarneri pillugit ilisimatitsissummik saqqummiussaqaartassapput. Ilisimatitsissummi ukiumi aningaasanut inatsisip atuuffiani aningaasanut inatsimmut naleqqiullugu aningaasaliissutit oqaasertaliussallu nu-taat imaluunniit aningaasaliissutit oqaasertaliussallu allannguutaat pillugit nalunaarsuusiaq ilaatinneqartassaaq.

§ 32. Aningaasaqarnermut Naalakkersuisoq aningaasartuutininut nakkutiginittarnissaq pillugu aalajangersagaliussaaq, tassungalu ilanngutissallugit naalakkersuisoqarfiit aningaasartuutit isertitallu nikerarneri pillugit nalunaaruteqartarnissaannik aalajangersakkat.

Kapitali 8

Aalajangersakkat allat

§ 33. Aningaasaqarnermut Naalakkersuisoq inatsisip uuma Missingersuusiornermut Malittarisassatigoortumik atuutsinneqarnissaa pillugu aalajangersagaliussaaq.

§ 34. Inatsit ulloq 1. januar 2001 atortuulerpoq.

Imm. 2. § 1, imm. 2-mi aamma § 25-mi aalajangersakkat Aningaasaqarnermut Ataatsimiititaliap oqartussaassuseqarneranut tunngasut ulloq 1. januar 2000 atortuulissapput.

Imm. 3. §§ 21 - 23-imi aalajangersakkat Sanaartugassanut Iluarsagassanullu Aningaasaateqarfimmut tunngasut ulloq 1. januar 2000 atortuulissapput.

Imm. 4. Missingersuusiortarnermut aningaasaliissuteqartarnermullu maleruagassat atuuttooreersut ukiumi aningaasanut inatsisip atuuffiani 2000-imi atuutiinnassapput.

Imm. 5. Ukioq 2001-imut aningaasanut inatsisissatut siunnersuut inatsimmi matumani aalajangersakkat malillugit suliarineqassaaq.

Imm. 6. § 26-mi aalajangersakkat ilassutitut aningaasaliissutininut inatsimmut ilanngussinissamut tunngasut ulloq 1. januar 2000 atortuulissapput.

Namminersornerullutik Oqartussat, ulloq 29. oktober 1999

Jonathan Motzfeldt

/

Josef Motzfeldt